

太宰府址碑

壤之廣者程之遠者管鎮不可不重也筑紫之為壤最廣其距帝都都不為不遠況新羅高麗百濟等之朝貢於我者皆湊於此故太宰帥古以親王任之其為重鎮可知矣國朝置府蓋在上古而太宰之名始見于推古紀至天智朝曰都督府聖武朝曰鎮西府清和朝曰外朝皆謂太宰府也延喜中菅原道真貶為權帥其詩有都府樓纔看瓦色之句指府樓也壽永中

安德帝西狩駐蹕當時尚存舊制云既而王綱解紐源賴朝以天野遠景為鎮西奉行建久中武藤資賴任太宰少貳子孫襲職府制亦大變降至足利氏之衰府廳遂廢矣今礎石存于壠間者二百有餘當時曹局所在雖不可復辨府門府樓其蹟可驗傍近傳為蔵司遺趾亦存礎石一百三十有餘學業院水城萱關亦堙圯僅知其處耳清承乏令于本縣六年於此矣每來迷鼓嶺之麓想見其雄圖偉畧未嘗無今昔之感也而里民或懇為畦畝殘礎多埋沒天明中國主黑田齊隆令禁之今茲庚辰御笠郡之諸子慨其終湮滅請建碑以紀之清已嘉其舉捐貲助之乃作銘曰

官寮允肅制度允嚴九州維宰三韓維監邊戍有備梓弓為林昇降有序水漏報音悠悠風雨府樓堙滅絲絲星霜礎石散列思川水枯鼓峯霜結千載之下淒風寒月陸軍大將兼左大臣議定官二品大勲位熾仁親王 篆額

福岡縣令從五位勲四等渡邊清撰正五位日下部東作書

明治十三年八月建

鳩山翠豐刻字